


Cu un sistema solar di 100kW

Brouwerij Nacional Balashi y SolCarib ta encabesa transicion pa energia sostenibel na Aruba

Esaki ta e prome sistema solar na Aruba pa provee energia stabiel, economico y limpi sin subsidio



ORANJESTAD (AAN): SolCarib den cooperacion cu MetaCorp a anuncia awe finalisacion di e trabounan di construcion di e sistema di energia solar di 100kW na Brouwerij Nacional Balashi. Siguiendo nan tradicion como un compania netamente

Arubiano, Brouwerij Nacional Balashi ta e prome compania riba ons isla pa genera energia limpi, economico y confiabel pa propio uzo den nan fabrica. E proyecto aki di 100kW ta e prome sistema comercial construi na Aruba, desde cu nos isla a uni cu Carbon War

Room y a compromete pa ta un isla cu energia 100% sostenibel na aña 2020.

E proyecto, disefia y construi pa Gehrlicher Solar America Corp., a uza contratistanan local pa instala mas di 400 "photovoltaic (PV) modules" riba dak di e fabrica di cerbes,

refresco, awa y malta. E compania Gehrlicher ta un compania di ingenieria y construcion multi nacional cu mas di 20 aña di experiencia.

Brouwerij Nacional Balashi a enfatisa cu "Nos ta masha orguyoso di por inverti den tecnologia responsabel pa nos medio ambiente y cu ta fisicamente viabel y cu ta hiba nos na un Aruba mucho mas sostenibel. Gehrlicher y SolCarib a traha masha di cerca cu Balashi pa yuda nos compronde e tecnologia solar y pa saca mas beneficio di nos inversion den metanan sostenibel".

E compromiso di Balashi pa encabesa e proceso di ta un ehempel den uzo di energia sostenibel na Aruba, combina cu e experiencia di Gehrlicher, sin duda a ilumina e comprension di e reguladornan local di e opcionnan comercial den uzo di "photovoltaic solar systems". E compania nacional di distribucion di coriente, NV Elmar, ta administrando un programa

masha progresivo pa cu uzo di energia solar pa promove mas uzo di energia renoba riba nos isla, cu proceduranan di interconexcion cu ta permiti penetracion solar, "boost grid reliability", stimula crecemento economico y reduci dependencia riba importacion di combustibel fossiel.

"E proyecto aki ta algo completamente nobo y moderno pa Aruba. Un manejo solar progresivo tambe ta rekeri cambio den e pensamiento cu nos a conoce den pasado riba energia, cambio burocracia y encurasha mas inversion for di sector priva. Nos kier felicita Gobierno di Aruba y NV Elmar pa crea un mercado den energia sostenibel pa inversionnan priva. E proyecto aki sin duda lo habri caminda pa un proceso acelera di mas uzo di energia solar na Aruba mes y den henter Caribe", asina Dave Williams, director ehecutivo di SolCarib a duna di conoce.




SolCarib ta un compania di desaroyo di solucionnan y distribucion di ekiponan pa energia solar y ta enfoca riba construi nacionnan solar rond di henter Caribe. SolCarib ta provee solucionnan di financiamiento y inversion pa companianan cualifica, den un esfuerso pa spaar placa y scapa nos planeta. Pa mas informacion por subi nan website, www.SolCarib.com.

Gehrlicher Solar America Corp. ta construi sistemanan di energia comercial y di utilidad pa companianan cu ta aparece den Fortune 1000 companies, companianan di utilidad, desaroyadornan y entidadnan di Gobierno. Cu mas di 20 aña di experiencia y conocimiento den ingenieria solar, construcion, operacion y mantencion, cu un portfolio di riba 750MW di instalacion di proyectonan mundialmente. Gehrlicher Solar America Corp. ta integra sistemanan pa garantisa cu ta recupera e inversionnan cu beneficionan sostenibel pa su clientenan. Pa mas informacion por subi nan website www.gehlichersolar.us.

E inauguracion oficial a tuma luga den presencia di Jeff Ghitman di SolCarib, Diego van Kempen di Brouwerij Nacional Balashi hunto cu Minister Michelle Hooyboer-Winklaar.

Brouwerij Nacional Balashi y Tropical Bottling Company a devela dak di panel solar

A presenta su linea di produccion mas eficiente y moderno



ORANJESTAD (AAN): Brouwerij Nacional Balashi y Tropical Bottling Company dialuna tabata anfitrión di un grupo di invitado VIP pa presentacion di e esfuersonan di e compania pa mehora eficiencia den uzo di e recursonan necesario pa

produci e productonan mas popular di bebida den nos mercado. E productonan aki ta encera nos cerbesnan nacional, esta Balashi y Chill, e refresconan nacional Tropical y e "Classic" line, como tambe tur producto di

Coca-Cola.

Como un bon bisiña cu e afan pa ofrece un producto mas "green" na nan mercadonan, incluyendo Aruba, Boneiro y Corsow, e companianan Brouwerij Nacional Balashi y Tropical Bottling Company

recientemente a aplica diferente tecnologia nobo y a haci diferente cambio den nan planta di produccion. Tur e mehoracion y innovacion introduci ta bay man den man cu e pensamiento di hisa eficiencia di produccion, hisa eficiencia den uzo di utilidad nan y tin menos impacto posibel riba nos medio ambiente.

Brouwerij Nacional Balashi y Tropical Bottling Company ta determina pa "lead by example" y orguyosamente a introduci nan dak di panel solar di 100kW y nan linea di produccion nobo na nan invitatodonan.

Eplanta nacional anualmente ta produci un impresionante 30.000 hecto liter di Chill y Balashi; 144.000 hecto liter di Coca-Cola y productonan di e compania Coca-Cola; 20.000 hecto liter di Tropical y e linea Classic; y 17.000 hecto liter di Awa. Esaki ta rekeri un bon programa den otro pa planea cada produccion y un fabrica y sistema di benta y distribucion moderno y bon coordina.

Ehecutivonan presente a splica cu e linea nobo ta haci posibel cu por produci cu mas eficiencia, ta produci mas producto pa dia pa medio di un capacidad di produccion mas halto, como cu awo tin dos linea den funcionamiento na mes momento. A scoge pa un linea cu un compressor mas chikito cu ademas ta miho pa medio ambiente pa su eficiencia den uzo di energia.

Pa loke ta nan productonan mes, Balashi y Tropical den transcurso di e ultimo dos añanan a introduci diferente cambio pa duna miho aporte na naturalesa y medio

ambiente en general. Entre otro, a introduci "statiegeld" riba e boternan di Balashi y Chill pa encurasha comunidad pa entrega esakinan bek pa reciclahe y siman pasa a introduci refresconan Tropical den un bachi nobo, cu ta uza menos material pa su presentacion. E ultimo aki ta encera menos uzo di plastic pa traha e boter, tapadera y tambe un label mas chikito.

Den e area di uzo di energia, esta coriente, e dak di panel solar cu a wordo instala pa SolCarib ta haci di e subsidiario aki di MetaCorp, e prome compania Arubano pa pone den uzo un sistema di su tipo, stabiel y di costo abao cu uzo di energia limpi, den funcionamiento. Asina, pa medio di e instalacion aki, Balashi y Tropical ta e prome compania cu ta genera su mesun energia, di costo abao y limpi, pa produci un producto mas "green".

E proyecto, cu ta encera 400 panel solar, a wordo diseña y construi pa Gehrlicher Solar America Corp. A scoge pa e proyecto aki, un compania local representa pa SolCarib a traha cu contratistanan local pa realisa e proyecto.

Incentiva pa e determinacion di Gobierno di Aruba pa haci di nos pais uno 100% sostenibel na aña 2020, Brouwerij Nacional Balashi y Tropical Bottling Company cu e instalacion di nan mesun fuente di energia a conta tambe cu e colaboracion di N.V. ELMAR den e proceso. E companianan ta contento y orguyoso di por contribui na un miho medio ambiente na Aruba y e vision pa Aruba yega na bira un pais sostenibel den uzo di energia.